

CAPUT XIX.

Aguntur gratia Deo de meretrice dam-
nata, de die nuptiarum Agni, & san-
ctorum remuneratiōe: Verbum Dei equo
albo insidens, exercitus caelestes comi-
tantur; impii ab avibus lacerantur.

† DE
PLUR.
MART.
TEMP.
PASCH.

1. † **P**ost hæc audivi quasi vocem
turbarum multarum in celo
dicentium: Alleluia: Salus, & gloria, &
virtus Deo nostro est:

2. quia vera, & iusta iudicia sunt eius,
qui iudicavit de meretrice magna, quæ
corrumpit terram in prostitutione sua, &
vindicavit sanguinem servorum suorum
de manibus eius.

3. Et iterum dixerunt: Alleluia. Et fu-
mus eius ascendit in sæcula sæculorum.

4. Et ceciderunt seniores vigintiqua-
tuor, & quatuor animalia, & adorave-
runt Deum sedentem super thronum, di-
centes: Amen: Alleluia.

5. Et vox de throno exivit, dicens:
Laudem dicite Deo nostro omnes servi
eius: & qui timetis eum pusilli, & magni.

6. Et audivi quasi vocem turbæ mag-
næ, & sicut vocem aquarum multarum,
& sicut vocem tonitruorum magnorum,
dicentium: Alleluia: quoniam regnavit
Dominus Deus noster omnipotens.

7. Gaudeamus, & exultemus: & de-
mus gloriam ei: quia venerunt nuptiæ
Agni, & uxor eius præparavit se.

8. Et datum est illi ut cooperiat se bys-
sino splendenti, & candido. Bysinum
enim iustificatiōes sunt Sanctorum.

9. Et dixit mihi: Scribe: * Beati, qui
ad cenam nuptiarum Agni vocati sunt: *
& dixit mihi: Hæc verba Dei vera sunt.

10. Et cecidi ante pedes eius, ut adora-
rem eum. Et dicit mihi: Vide ne feceris:
conservus tuus sum, & fratrum tuorum
habentium testimonium Iesu. Deum adora.
Testimonium enim Iesu est spiritus
prophetia.

11. Et vidi celum apertum, & ecce
equus albus, & qui sedebat super eum,
vocabatur Fidelis, & Verax, & cum iusti-
tia iudicat, & pugnat.

12. Oculi autem eius sicut flamma ignis,
& in capite eius diademata multa, habens
nomen scriptum, quod nemo novit nisi ipse.

13. * Et vestitus erat veste aspersa sangui-
ne: & vocabatur nomen eius, Verbum Dei.

14. Et exercitus qui sunt in celo, se-
quebantur eum in equis albis, vestiti bys-
sino albo, & mundo.

15. Et de ore eius procedit gladius ex
utrâque parte acutus: ut in ipso percütat
Gentes. * Et ipse reget eas in virga ferrea:
& ipse calcet torcular vini furoris iræ Dei
omnipotentis. * Psal. 2. 9.

16. Et habet in vestimento, & in fe-
more suo scriptum: * Rex regum, & Do-
minus dominantium. * 1. Tim. 6.

17. Et vidi unum Angelum stantem in
sole, & clamavit voce magna, dicens:
omnibus avibus, quæ volabant per me-
dium caeli: Venite, & congregamini ad
cenam magnam Dei:

18. ut manducetis carnes regum, &
carnes tribunorum, & carnes fortium, &
carnes equorum, & sedentium in ipsis, &
carnes omnium liberorum, & servorum,
& pusillorum, & magnorum.

19. Et vidi bestiam, & reges terræ, &
exercitus eorum congregatos ad facien-
dum prælium cum illo, qui sedebat in
equo, & cum exercitu eius.

20. Et apprehensa est bestia, & cum ea
pseudopropheta: qui fecit signa coram
ipso, quibus seduxit eos, qui acceperunt
characterem bestia, & qui adoraverunt
imaginem eius. Vivi missi sunt hi duo in
stagnum ignis ardentis sulphure:

21. Et ceteri occisi sunt in gladio sedentis
super equum, qui procedit de ore ipsius: &
omnes aves saturatae sunt carnibus eorum.

CAPUT XX.

Angelus vincitum draconem in abyssum pra-
cipitem dat: prima resurrectio: mille
annorum regnum: solutus satanas se-
ducit populos.

1. **E**T vidi Angelum descendentem de
caelo, habentem clavem abyssi,
& catenam magnam in manu sua.

2. Et apprehendit draconem, serpen-
tem antiquum, qui est diabolus, & sa-
tanus, & ligavit eum per annos mille:

3. & misit eum in abyssum, & clausit,
& signavit super illum ut non seducat am-
plius gentes, donec consummentur mille
anni: & post hæc oportet illum solvi mo-
dico tempore.

4. Et vidi sedes, & sederunt super eas,
& iudicium datum est illis: & animas de-
collatorum propter testimonium Iesu, &
propter verbum Dei, & qui non adora-
verunt bestiam, neque imaginem eius,
nec acceperunt characterem eius in fron-
tibus, aut in manibus suis, & vixerunt, &
regnaverunt cum Christo mille annis.

5. Ceteri mortuorum non vixerunt,
dó-

dóne consummentur mille anni: Hæc est
resurrectio prima.

6. Beatus, & sanctus, qui habet par-
tem in resurrectione prima: in his secun-
da mors non habet potestatem: sed erunt
sacerdotes Dei & Christi, & regnabunt
cum illo mille annis.

7. Et cum consummati fuerint mille
anni, solvetur satanas de carcere suo, &
exibit, & seducet Gentes, quæ sunt super
quatuor angulos terræ, * Gog, & Magog,
& congregabit eos in prælium, quorum
numerus est sicut arena maris.

8. Et ascenderunt super latitudinem
terræ, & circumierunt castra sanctorum,
& civitatem dilectam.

9. Et descendit ignis à Deo de celo, &
devoravit eos: & Diabolus, qui seduce-
bat eos, missus est in stagnum ignis, &
sulphuris, ubi & bestia,

10. & pseudopropheta cruciabuntur die
ac nocte in sæcula sæculorum.

11. Et vidi thronum magnum candi-
dum, & sedentem super eum, à cuius
conspectu fugit terra, & celum, & locus
non est inventus eis.

12. Et vidi mortuos magnos, & pusillos
stantes in conspectu throni, & libri aperti
sunt: & alius Liber apertus est qui est vita:
& iudicati sunt mortui ex his, quæ scripta
erant in libris secundum opera ipsorum.

13. & dedit mare mortuos, qui in eo
erant: & infernus dederunt mor-
tuos suos, qui in ipsis erant: & iudicatum
est de singulis secundum opera ipsorum.

14. Et infernus, & mors missi sunt in
stagnum ignis. Hæc est mors secunda.

15. Et qui non inventus est in Libro
vitæ scriptus, missus est in stagnum ignis.

CAPUT XXI.

Post eversum Antichristi regnum, caelestis Ie-
rusalem describitur, eius opes & splendor,
muri, porta, dimensiones, duodecim fun-
daménta; felicitas denique delineantur.

* Isai. 65. 1. **E**T vidi * celum novum, & terram
17. & 66. novam. Primum enim celum,
22. & prima terra abiit, & mare iam non est.

2. Et ego Ioannes † vidi sanctam civi-
tatem Ierusalem novam descendentem de
caelo à Deo, paratam, sicut sponsam or-
natam viro suo.

3. Et audivi vocem magnam de throno
dicentem: Ecce tabernaculum Dei cum
hominibus, & habitabit cum eis. Et ipsi
populus eius erunt, & ipse Deus cum eis
erit eorum Deus:

4. * & absterget Deus omnem lacry-
mam ab oculis eorum: & mors ultra non
erit, neque luctus, neque clamor, neque
dolor erit ultra, quia prima abiierunt.

5. Et dixit qui sedebat in throno: * Ecce
nova facio omnia. * Et dixit mihi: Scri-
be, quia hæc verba fidelissima sunt, & vera.

6. Et dixit mihi: Factum est. ego sum *alpha*,
& *omega*: initium, & finis. Ego sitienti dabo
de fonte aquæ vitæ, gratis.

7. Qui vicerit, possidebit hæc, & erit
illi Deus, & ille erit mihi filius.

8. Timidis autem, & incredulis, & exe-
cratis, & homicidis, & fornicatoribus,
& veneficis, & idololâtris, & omnibus mendacibus,
pars illorum erit in stagno ardenti igne,
& sulphure: quod est mors secunda.

9. Et venit unus de septem Angelis ha-
bentibus phialas plenas septem plagis no-
vissimis, & locutus est mecum, dicens:
Veni, & ostendam tibi sponsam, uxorem
Agni.

10. Et sustulit me in spiritu in montem
magnum, & altum, & ostendit mihi civi-
tatem sanctam Ierusalem descendentem de
caelo à Deo,

11. habentem claritatem Dei: & lumen
eius simile lapidi pretioso tamquam lapidi
iaspidis, sicut crystallum.

12. Et habebat murum magnum, & al-
tum, habentem portas duodecim: & in
portis Angelos duodecim, & nomina ins-
cripta, quæ sunt nomina duodecim tri-
buum filiorum Israël.

13. Ab Oriente portæ tres: & ab Aquilone
portæ tres: & ab Austro portæ tres:
& ab Occasu portæ tres.

14. Et murus civitatis habens funda-
ménta duodecim, & in ipsis duodecim no-
mina duodecim Apostolorum Agni.

15. Et qui loquebatur mecum, habebat
mensuram arundineam auream, ut metire-
tur civitatem, & portas eius, & murum.

16. & civitas in quadro posita est, &
longitudo eius tanta est quanta & latitudo:
& mensus est civitatem de arundine aurea
per stadia duodecim millia: & longitudo,
& altitudo, & latitudo eius æqualia sunt.

17. Et mensus est murum eius centum
quadraginta quatuor cubitorum, mensu-
ra hominis, quæ est angeli.

18. Et erat structura muri eius ex lapi-
de iaspide: ipsa vero civitas aurum mun-
dum simile vitro mundo.

19. Et fundamenta muri civitatis omni
lapide pretioso ornata. Fundamentum pri-
mum, iaspis: secundum, sapphirus: ter-
tium,

LIII tium,

tium, calcedónius: quartum, smaragdus:
20. quintum, sárdonyx: sextum, sár-
dius: séptimum, chrysolithus: octávum,
beryllus: nonum, topázus: décimum,
chrysóprafus: undécimum, hyacínthus:
duodécimum, amethystus.

21. Et duodécim portæ, duodécim
margaritæ sunt, per singulas: & singulæ
portæ erant ex singulis margaritis: & pla-
tæa civitatis aurum mundum, tamquam
vitrum perlucidum.

22. Et templum non vidi in ea. Dómi-
nus enim Deus omnipotens templum illius
est, & Agnus.

* *Isai. 60.* 23. * Et civitas non eget sole, neque
19. lunâ ut luceant in ea. nam claritas Dei
illuminavit eam, & lucerna eius est Agnus.

24. Et ambulabunt gentes in lumine
eius: & reges terræ afferent glóriam suam,
& honorem in illam.

* *Isai. 60.* 25. * Et portæ eius non clauduntur per
11. diem: nox enim non erit illis.

26. Et afferent glóriam, & honorem
gentium in illam.

27. Non intrabit in eam aliquod coin-
quinatum, aut abominatióem faciens, &
mendacium, nisi qui scripti sunt in libro
vitæ Agni.

CAPUT XXII.

Videt Ioannes fluvium aqua viva, qui è thro-
no Dei emanat; & ex utraque ripa arbo-
res. Beati qui Agni sanguine mundantur.

1. ET ostendit mihi fluvium aquæ vi-
tæ, splendidum tamquam cry-
stallum, procedentem de sede Dei & Agni.

2. In medio platæa eius, & ex utraque
parte fluminis lignum vitæ, afferens fru-
ctus duodécim, per menses singulos red-
dens fructum suum, & fólia ligni ad sani-
tatem Géntium.

3. Et omne maledictum non erit am-
plius: sed sedes Dei, & Agni in illa erunt,
& servi eius servient illi.

4. Et videbunt faciem eius: & nomen
eius in fróntibus eorum.

* *Isai. 60.* 5. * Et nox ultra non erit: & non egé-
20. bunt lumine lucernæ, neque lumine solis,
quóniam Dóminus Deus illuminabit illos,
& regnabunt in sæcula sæculorum.

6. Et dixit mihi: Hæc verba fidelissima

sunt, & vera. Et Dóminus Deus spirituum
prophetarum misit Angelum suum ostén-
dere servis suis quæ oportet fieri citò.

7. Et ecce vénio velocitèr. Beatus, qui
custodit verba prophetiæ libri huius.

8. Et ego Ioannes, qui audivi, & vidi
hæc. Et postquam audissem, & vidissem,
cécidi ut adorarem ante pedes angeli, qui
mihi hæc ostendebat:

9. & dixit mihi: Vide ne féceris: con-
servus enim tuus sum, & fratrum tuorum
prophetarum, & eorum, qui servant ver-
ba prophetiæ libri huius: Deum adóra.

10. Et dicit mihi: Ne signáveris verba
prophetiæ libri huius: tempus enim pro-
pè est.

11. Qui nocet, nóceat adhuc: & qui
in sórdibus est, fordéscat adhuc: & qui
iustus est, iustificétur adhuc: & sanctus,
sanctificétur adhuc.

12. Ecce vénio citò, & merces mea me-
cum est, réddere unicuique secundum
ópera sua.

13. * Ego sum *a*, & *o*, primus, & no-
visimus, principium, & finis. * *Isai. 41.*
4. & 44. 6.

14. Beati, qui lavant stolas suas in san-
guine Agni: ut sit potestas eorum in ligno
vitæ, & per portas intrent in civitatem. * *Isai. 12.*
Supr. 1. 8.
& 17. 6.

15. Foris canes, & venéfici, & impu-
dici, & homicidæ, & idólis servientes,
& omnis, qui amat, & facit mendacium.

16. Ego Iesus misi Angelum meum,
testificari vobis hæc in Ecclesiis. Ego sum
radix, & genus David, stella splendida,
& matutina.

17. Et spiritus, & sponsa dicunt: Veni. Et
qui audit, dicat: Veni. Et qui sitit, veniat:

* & qui vult, accipiat aquam vitæ, gratis. * *Isai. 55.*
1.

18. Contéstor enim omni audienti ver-
ba prophetiæ libri huius: Si quis appo-
suerit ad hæc, appónet Deus super illum
plagas scriptas in libro isto.

19. Et si quis diminúerit de verbis libri
prophetiæ huius, áuferet Deus partem eius
de libro vitæ, & de civitate sancta, & de
his, quæ scripta sunt in libro isto.

20. dicit qui testimónium pérhibet isto-
rum. Etiam vénio citò: Amen. Veni
Dómine Iesu.

21. Grátia Dómini nostri Iesu Christi
cum ómnibus vobis. Amen.

F I N I S.

ORA-

ORATIO MANASSÆ, NECNON LIBRI DUO, QUI SUB LIBRI TERTII ET QUARTI
*Esdra nomine circumferuntur, hoc in loco, extra scilicet seriem Canonorum Librorum, quos
sancta Tridentina Synodus suscepit, & pro Canonicis suscipiendos decrevit, sepositi sunt, ne prorsus
interirent, quippe qui à nonnullis sanctis Patribus interdum citantur, & in aliquibus Bibliis La-
tinis tam manuscriptis quam impressis reperiuntur.*

ORATIO MANASSÆ REGIS IUDA, CUM CAPTUS TENERETUR IN BABYLONE.



Domine omnipotens Deus patrum nostrom,
Abraham, & Isaac, & Iacob, & fe-
minis eorum iusti, qui fecisti cælum & ter-
ram cum omni ornatu eorum, qui ligasti
mare verbo præcepti tui, qui conclusisti
abyssum, & signasti eam terribili & lauda-
bili nomine tuo: quem omnia pavent, &
tremunt à vultu virtutis tuæ, quia impor-
tabilis est magnificentia gloriæ tuæ, & insistentabilis ira com-
minationis tuæ super peccatores: immensa verò & investiga-
bilis misericordia promissionis tuæ: quoniam tu es Dominus,
altissimus, benignus, longánimus, & multum misericors, &
penitens super malitias hominum. Tu Domine, secundum
multitudinem bonitatis tuæ promissisti penitentiam, & remis-
sionem iis, qui peccaverunt tibi, & multitudine miserationum
tuarum decrevisti penitentiam peccatoribus, in salu-
tem. Tu igitur Domine Deus iustorum, non posuisti peniten-
tiam iustis, Abraham, & Isaac, & Iacob, iis qui tibi non pec-
caverunt: sed posuisti penitentiam propter me peccato-

rem: quoniam peccavi super numerum arenæ maris: multi-
plicata sunt iniquitates meæ Domine, multiplicatae sunt ini-
quitates meæ, & non sum dignus intueri & aspicerè altitudi-
nem cæli, præ multitudine iniquitatum mearum. Incurvarus
sum multo vinculo ferreo, ut non possim attollere caput
meum, & non est respiratio mihi: quia excitavi iracundiam
tuam, & malum coram te feci: non feci voluntatem tuam, &
mandata tua non custodivi: statui abominaciones, & multi-
plicavi offensiones. Et nunc flecto genu cordis mei, precans
à te bonitatem. Peccavi Domine, peceavi, & iniquitates meas
agnosco. Quare peto rogans te, remitte mihi Domine, re-
mitte mihi, & ne simul perdas me cum iniquitatibus meis,
neque in æternum, iratus, reserves mala mihi, neque dam-
nes me in infima terræ loca: quia tu es Deus, Deus, in-
quam, penitentium: & in me ostendes omnem bonitatem
tuam, quia indignum salvabis me secundum magnam mis-
ericordiam tuam, & laudabo te semper omnibus diebus vitæ
meæ: quoniam te laudat omnis virtus cælorum, & tibi est
gloria in sæcula sæculorum. Amen.

LIBER ESDRÆ TERTIUS.

CAPUT PRIMUM.

Magnificum Phasæ, quod Iosias immolavit, celebrando septem
diebus festum Azmorum, cui successerunt in regno Iuda, Ie-
chonias, Ioachim, Ioachin, & Sedecias: eorumque ac populi
captivitas propter sua scelera; urbisque subversio describuntur.



T fecit Iosias Pascha in Ierosolymis Do-
mino, & immolavit Phasæ quartâ deci-
mâ luna primi mensis:

2. statuens sacerdotes per vices die-
rum stolis amictos in templo Domini.

3. & dixit Levitis sacris servis Israël,
ut sanctificarent se Domino in positione
sanctæ arce Domini, in domo, quam
ædificavit Salomon filius David rex.

4. Non erit vobis tollere super humeros eam. Et nunc deser-
vite Domino vestro, & curam agite gentis illius Israël ex par-
te secundum pagos & tribus vestras,

5. secundum scripturam David regis Israël, & secundum
magnificentiam Salomonis filii eius, omnes in templo, & se-
cundum particulam principatus paternam vestram eorum,
qui stant in conspectu fratrum filiorum Israël.

6. Immolate Pascha, & sacrificia parate fratribus vestris, &
facite secundum præceptum Domini quod datum est Moyfi.

7. Et donavit Iosias in plebem, quæ inventa est, ovium,
agnorum, & hædorum, & caprarum triginta millia, vitulos
tria millia.

8. hæc de regalibus data sunt secundum promissionem po-
pulo: & sacerdotibus in Pascha, oves numero duo millia, ac
vituli centum.

9. Et Iechonias, & Semeias, & Nathanaël fratres, & Hafa-
bias, & Oziel, & Coraba in Phasæ, oves quinque millia, vi-
tulos quingentos.

10. Et hæc cum fierent eleganter, steterunt sacerdotes &
Levitæ habentes azyma per tribus.

11. Et secundum partes principatus patrum in conspectu
populi offerebant Domino, secundum ea quæ in libro Moyfi
scripta sunt:

12. & allaverunt Phasæ igni prout oportebat: & hostias co-
xiunt in emolis, & in ollis cum benevolentia:

13. & attulerunt omnibus qui erant ex plebe: & post hæc
paraverunt sibi & sacerdotibus:

14. Sacerdotes enim offerebant adipem, usque dum finita
esset hora: & Levitæ paraverunt sibi, & fratribus suis, filiis
Aaron.

LIII 2

15. Et